



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN
E TË DHËNAVE PERSONALE

Nr. 522/3 Prot

Tiranë, më 15.06.2016

VENDIM

Nr. 30, datë 15.06.2016

Në mbështetje të neneve 29, 30 dhe 32 të Ligjit nr. 9887, datë 10.03.2008, "Për Mbrojtjen e të Dhënave Personale" i ndryshuar, Ligjit Nr. 44/2015, datë 30.04.2015, "Kodi i Procedurave Administrative të Republikës së Shqipërisë", si dhe provave të administruara në ngarkim të kontrolluesit Spitali Rajonal "Teni Konomi" Korçë, me aktivitetin e tij në formën ligjore person juridik,

VËREJ SE :

Në zbatim të Urdhrit Nr. 111, datë 16.05.2016 të Komisionerit për të Drejtën e Informimit dhe Mbrojtjen e të Dhënave Personale, për kryerjen e hetimit administrativ, më datë 16.05.2016 e në vazhdim, grupi i inspektimit i përbërë nga _____ dhe _____, filloi procesin e hetimit administrativ pranë kontrolluesit, Spitali Rajonal "Teni Konomi" Korçë, me objekt:

- Zbatimi nga ana e kontrolluesit Spitali Rajonal "Teni Konomi" Korçë, i Ligjit Nr. 9887, datë 10.03.2008, "Për Mbrojtjen e të Dhënave Personale" i ndryshuar, dhe akteve të miratuara nga Komisioneri gjatë kryerjes së aktivitetit të tij, në lidhje me masat për sigurinë e të dhënave personale, në zbatim të nenit 27 të ligjit.

Grupi i kontrollit, gjatë kryerjes së veprimeve procedurale, u asistua nga përfaqësuesit e kontrolluesit, të cilët ishin njohur me Urdhrit Nr. 111, datë 16.05.2016 të Komisionerit "Për kryerjen e hetimit administrativ" që do të ushtrohet pranë këtij kontrolluesi.

Nga hetimi administrativ i kryer pranë këtij kontrolluesi u konstatua:

- 1.Kontrolluesi nuk ka njoftuar pranë zyrës së Komisionerit mbi përpunimin e të dhënave personale;
- 2.Kontrolluesi ka një rregullore mbi organizimin dhe funksionimin e spitalit, por nuk ka një rregullore specifike për mbrojtjen e të dhënave personale;
- 3.Kontrolluesi nuk aplikon për punëmarrësit "Deklaratën e Konfidencialitetit";
- 4.Kontrolluesi ka marrë masa teknike të përshtatshme për ruajtjen e dosjeve fizike të pacientëve pranë kartotekës;

5.Konstatohet se në ambientet e kontrolluesi funksionon Telemedecina si projekt i USAID dhe Ministrisë së Shëndetësisë. Në funksion të kësaj veprimtarie është një aplikacion i bazuar në "web", ku ngarkohen të dhënat e pacientëve që konsultohen online nga mjekë të autorizuar.

6.Konstatohet se kontrolluesi *Spitali Rajonal "Teni Konomi", Korçë*, jo vetëm që nuk ka të nënshkruar aneks-kontratën tip mbi delegimin e përpunimit të të dhënave nëpërmjet sistemit të video-vëzhgimit (CCTV), sipas udhëzimit 19 të Komisionerit, por nuk ka të parashikuar gjithashtu në kontratën përkatëse asnjë klauzolë mbi detyrimin e ruajtjes së privatësisë dhe konfidencialitetit të subjekteve të të dhënave nga pala zbatuese.

7.Konstatohet se në ambientet e mbikëqyrura nëpërmjet sistemit të video-vëzhgimit (CCTV), nuk janë vendosur tabelat informuese mbi prezencën e tij.

Faktet e mësipërme përbëjnë shkelje administrative të neneve 18, 21, 22, 27 dhe 28 të Ligjit Nr.9887 datë 10.03.2008, "Për Mbrojtjen e të Dhënave Personale" i ndryshuar, Vendimit Nr.6 "Për përcaktimin e rregullave të hollësishme për sigurimin e të dhënave personale", si dhe Udhëzimit Nr.19, "Mbi rregullimin e marrëdhënieve mes kontrolluesit dhe përpunuesit në rastet e delegimit të përpunimit të të dhënave dhe përdorimin e një kontrate tip në rastet e këtij delegimi".

Në cilësinë e provës materiale, këtij procesverbali i bashkëngjiten këto dokumente:

- Kontratë me punëmarrësin, *Mjek, infermier dhe recepcionist*;
- Rregullore e brendshme e *Spitalit Rajonal "Teni Konomi" Korçë*;
- Fotografi nga ambientet e kartotekës;
- Struktura organizative e institucionit;
- Kontratë me palë të tretë.

Në datë 31.05.2016, në zbatim të kërkesave të Urdhrit Nr. 111, datë 16.05.2016 të Komisionerit, u mbajt procesverbali nga ana e grupit të inspektimit të Zyrës së K.D.I.M.D.P-së, në prani të përfaqësuesve të kontrolluesit *Spitali Rajonal "Teni Konomi" Korçë*.

Procesverbali u lexua në prani të përfaqësuesve të kontrolluesit, të cilët u shprehën se pretendimet do i paraqesin në seancën dëgjimore.

Në zbatim të neneve 87 dhe 88 të Ligjit Nr. 44/2015 "*Kodi i Procedurave Administrative të Republikës së Shqipërisë*", datë 30.04.2015, në datë 13.06.2016, përpara marrjes së vendimit përfundimtar, është organizuar seanca dëgjimore me përfaqësuesit e kontrolluesit lidhur me konstatimet e grupit të kontrollit administrativ.

Në seancë dëgjimore përfaqësuesi i kontrolluesit, nuk paraqiti pretendime por kërkoi kohë të mjaftueshme, në përmbushjen e shkeljeve të konstatuara nga grupi i hetimit administrativ dhe të pranuar si të tilla nga kontrolluesi.

Për sa më sipër, Zyra e Komisionerit konkludon se, shkeljet e konstatuara gjatë ushtrimit të hetimit administrativ në kuptim të nenit 39 pika 1, gërmat “b”, “d” dhe “dh” të Ligjit Nr.9887, datë 10.03.2008 “Për Mbrojtjen e të Dhënave Personale” i ndryshuar, janë serioze për vetë faktin e përmasës së kontrolluesit, (Spital Rajonal), gamës së të dhënave sensitive që ky kontrollues mbledh e përpunon. Si të tilla këto shkelje përbëjnë “kundërvajtje administrative”, dhe sanksionohen me gjobë si më poshtë:

-b) kontrolluesit që nuk përmbushin detyrimin për të informuar, të përcaktuar në nenin 18 të këtij ligji, dënohen me 10 000 deri në 300 000 lekë.

-d) kontrolluesit, që nuk përmbushin detyrimin për të njoftuar, sipas përcaktimit në nenin 21 të këtij ligji, dënohen me 10 000 deri në 500 000 lekë;

-dh) Kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10 000 deri në 150 000 lekë.”

Kontrolluesi, “Spitali Rajonal Korçë”, në formën ligjore të aktivitetit të tij është person juridik dhe, sipas nenit 39/2 për kundërvajtjet e mësipërme, dënohet me dyfishin e gjobës së përcaktuar në pikën 1 të këtij neni.

Për zgjedhjen e masës së gjobës, Komisioneri ka parasysh faktin se shkeljet e konstatuara konsistojnë në moszbatim të ligjit, akteve nënligjore dhe parimeve bazë të mbrojtjes së të dhënave personale. Ato lidhen me cënimin e sigurisë së të dhënave personale të subjekteve të të dhënave “pacientë”.

PËR KËTO ARSYE:

Në zbatim të neneve 18, 21, 22, 27, 28, 39 paragrafi 1, gërmat “b”, “d” dhe “dh”, si dhe nenit 39, paragrafi 2 i Ligjit Nr. 9887, datë 10.03.2008 “Për Mbrojtjen e të Dhënave Personale” i ndryshuar,

V E N D O S A:

1. Dënimin e kontrolluesit, *Spitali Rajonal “Teni Konomi”, Korçë* me gjobë në vlerën **20.000 (njëzetë mijë) lekë**, për shkelje të detyrimit të përcaktuar në nenin 18 të Ligjit Nr. 9887, datë 10.03.2008 “Për Mbrojtjen e të Dhënave Personale” i ndryshuar.
2. Dënimin e kontrolluesit *Spitali Rajonal “Teni Konomi”, Korçë* me gjobë në vlerën **50.000 (pesëdhjetë mijë) lekë** për shkelje të detyrimit të përcaktuar në nenin 21, 22 të Ligjit Nr. 9887, datë 10.03.2008 “Për Mbrojtjen e të Dhënave Personale” i ndryshuar.
3. Dënimin e kontrolluesit *Spitali Rajonal “Teni Konomi”, Korçë* me gjobë në vlerën **50.000 (pesëdhjetë mijë) lekë** për shkelje të detyrimit të përcaktuar në nenin 27 të Ligjit Nr.9887, datë 10.03.2008 “Për Mbrojtjen e të Dhënave Personale” i ndryshuar.

4. Dënimin e kontrolluesit *Spitali Rajonal "Teni Konomi", Korçë* me gjobë në vlerën **50.000 (pesëdhjetë mijë) lekë** për shkelje të detyrimit të përcaktuar në nenin 28 të Ligjit Nr.9887, datë 10.03.2008 "*Për Mbrojtjen e të Dhënave Personale*" i ndryshuar.
5. Kontrolluesi, *Spitali Rajonal "Teni Konomi", Korçë* të hartojë rregulloren për mbrojtjen e të dhënave personale, të realizojë pajisjen e kontratave të punëmarrësve me Deklaratat e Konfidencialitetit sipas Vendimit Nr.6, datë 05.08.2013, si dhe të formalizojë aneks kontratën me përpunuesin, brenda një periudhe prej 30 ditësh.
6. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e afatit të ankimit, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.
7. Kundër këtij vendimi mund të bëhet ankim në Gjykatën Administrative të Shkallës së Parë, Tiranë, brenda 30 (tridhjetë) ditëve nga komunikimi i këtij vendimi.

Ky vendim u shpall sot, më 15.06.2016

Besnik DERVISHI

KOMISIONERI
